

後漢書

人物全傳

[4]

「纪传版二十六史」 国学网精校本

「南朝」 范晔 撰



北京时代华文书局

後漢書

人物全傳

[4]

列傳〔下〕

〔紀傳版二十六史〕 國學網精校本

〔南朝〕 范曄 撰 周殿富 主編 方銘 點校



北京時代華文書局

紀傳版

史

目 录

第四卷 列传

卷六十五·皇甫规 张奐 段颎 1401

卷六十六·陈蕃 王允 1421

卷六十七·党锢 1437

刘淑 / 李膺 / 杜密 / 刘祐 / 魏朗 / 夏馥 / 宗慈 / 巴肃 / 范滂
尹勋 / 蔡衍 / 羊陟 / 张俭 / 岑暄 / 陈翔 / 孔昱 / 苑康 / 檀敷
刘儒 / 贾彪 / 何颙

卷六十八·郭太 符融 许劭 1463

卷六十九·窦武 何进 1472

卷七十·郑太 孔融 荀彧 1484

卷七十一·皇甫嵩 朱儁 1512

卷七十二·董卓 1525

卷七十三·刘虞 公孙瓒 陶谦 1547

卷七十四上·袁绍 1559

卷七十四下·绍子谭 刘表 1584

卷七十五·刘焉 袁术 吕布 1598

卷七十六·循吏 1615

卫飒 / 任延 / 王景 / 秦彭 / 王涣 / 许荆 / 孟尝 / 第五访
刘矩 / 刘宠 / 仇览 / 童恢

卷七十七·酷吏 1635

董宣 / 樊晔 / 李章 / 周纡 / 黄昌 / 阳球 / 王吉

卷七十八·宦者 1647

郑众 / 蔡伦 / 孙程 / 曹腾 / 单超 / 侯览 / 曹节 / 吕强 / 张让

卷七十九上·儒林 1671

刘昆 / 洼丹 / 任安 / 杨政 / 张兴 / 戴凭 / 孙期 / 欧阳歙
牟长 / 宋登 / 张驯 / 尹敏 / 周防 / 孔僖 / 杨伦

卷七十九下·儒林 1687

高诩 / 包咸 / 魏应 / 伏恭 / 任末 / 景鸾 / 薛汉 / 杜抚 / 召驯
杨仁 / 赵晔 / 卫宏 / 董钧 / 丁恭 / 周泽 / 钟兴 / 甄宇 / 楼望
程曾 / 张玄 / 李育 / 何休 / 服虔 / 颖容 / 谢该 / 许慎 / 蔡玄

卷八十上·文苑 1704

杜笃 / 王隆 / 夏恭 / 傅毅 / 黄香 / 刘毅 / 李尤 / 苏顺 / 刘珍
葛龚 / 王逸 / 崔琦 / 边韶

卷八十下·文苑 1725

张升 / 赵壹 / 刘梁 / 边让 / 邴炎 / 侯瑾 / 高彪 / 张超 / 祢衡

卷八十一·独行 1748

谯玄 / 李业 / 刘茂 / 温序 / 彭修 / 索卢放 / 周嘉 / 范式
李善 / 王忱 / 张武 / 陆续 / 戴封 / 李充 / 缪彤 / 陈重
雷义 / 范冉 / 戴就 / 赵苞 / 向栩 / 谅辅 / 刘翊 / 王烈

卷八十二上·方术 1772

任文公 / 郭宪 / 高获 / 王乔 / 谢夷吾 / 杨由 / 李南 / 李邵
段翳 / 廖扶 / 折像 / 樊英

卷八十二下·方术 1789

唐檀 / 公沙穆 / 许曼 / 赵彦 / 樊志张 / 单飏 / 韩说 / 董扶
郭玉 / 华佗 / 徐登 / 费长房 / 荀子训 / 刘根 / 左慈
计子勋 / 上成公 / 解奴辜 / 甘始 / 王真 / 王和平

卷八十三·逸民 1807

野王二老 / 向长 / 逢萌 / 周党 / 王霸 / 严光 / 井丹 / 梁鸿
高凤 / 台佟 / 韩康 / 矫慎 / 戴良 / 法真 / 汉阴老父
陈留老父 / 庞公

卷八十四·列女 1824

鲍宣妻 / 王霸妻 / 姜诗妻 / 周郁妻 / 曹世叔妻 / 乐羊子妻
程文矩妻 / 孝女曹娥 / 许升妻 / 袁隗妻 / 庞涪母 / 刘长卿妻
皇甫规妻 / 阴瑜妻 / 盛道妻 / 孝女叔先雄 / 董祀妻

卷八十五·东夷 1841

夫餘 / 挹婁 / 高句骊 / 东沃沮 / 濊 / 三韩 / 倭

卷八十六·南蛮 巴郡南郡蛮 / 板楯蛮夷 **西南夷** 夜郎

滇 / 哀牢 / 邛都 / 笮都 / 冉駹 / 白马氏 1854

卷八十七·西羌 1880

羌无弋爰剑 / 滇良 / 东号子麻奴 / 湟中月氏胡

卷八十八·西域 1906

拘弥 / 于阗 / 西夜 / 子合 / 德若 / 条支 / 安息 / 大秦
大月氏 / 高附 / 天竺 / 东离 / 栗弋 / 严 / 奄蔡 / 莎车
疏勒 / 焉耆 / 蒲类 / 移支 / 东且弥 / 车师

卷八十九·南匈奴 1926

卷九十·乌桓 鲜卑 1951

皇甫规 张奂 段颎

皇甫规字威明，安定朝那人也。祖父棱，度辽将军。父旗，扶风都尉。

永和六年，西羌大寇三辅，围安定，征西将军马贤将诸郡兵击之，不能克。规虽在布衣，见贤不恤军事，审其必败，乃上书言状。寻而贤果为羌所没。郡将知规有兵略，乃命为功曹，使率甲士八百，与羌交战，斩首数级，贼遂退却。举规上计掾。其后羌众大合，攻烧陇西，朝廷患之。规乃上疏求乞自効，曰：“臣比年以来，数陈便宜。羌戎未动，策其将反，马贤始出，颇知必败。误中之言，在可考校。臣每惟贤等拥众四年，未有成功，悬师之费且百亿计^①，出于平人，回入奸吏^②。故江湖之人，群为盗贼，青、徐荒饥，襁负流散。夫羌戎溃叛，不由承平，皆由边将失于绥御。乘常守安，则加侵暴，苟竞小利，则致大害，微胜则虚张首级，军败则隐匿不言。军士劳怨，困于猾吏，进不得快战以徼功，退不得温饱以全命，饿死沟渠，暴骨中原。徒见王师之出，不闻振旅之声^③。酋豪泣血，惊惧生变。是以安不能久，败则经年。臣所以搏手叩心而增叹者也。愿假臣两营二郡^④，屯列坐食之兵五千，出其不意，与护羌校尉赵冲共相首尾。土地山谷，臣所晓

习；兵執巧便，臣已更之。可不烦方寸之印，尺帛之赐，高可以涤患，下可以纳降。若谓臣年少官轻，不足用者，凡诸败将，非官爵之不高，年齿之不迈^⑤。臣不胜至诚，没死自陈。”时帝不能用。

①悬犹停也。②平人，齐人也。③振，整；旅，众也。《穀梁传》曰“出曰治兵，入曰振旅”也。④两营谓马贤及赵冲等。二郡，安定、陇西也。⑤迈，往也。

冲质之间，梁太后临朝，规举贤良方正。对策曰：

伏惟孝顺皇帝，初勤王政，纪纲四方，几以获安。后遭奸伪，威分近习^①，畜货聚马，戏谑是闻；又因缘嬖幸，受赂卖爵，轻使宾客，交错其间，天下扰扰，从乱如归^②。故每有征战，鲜不挫伤，官民并竭，上下穷虚。臣在关西，窃听风声，未闻国家有所先后^③，而威福之来，咸归权幸。陛下体兼乾坤，聪哲纯茂。摄政之初，拔用忠贞，其余维纲，多所改正。远近翕然，望见太平。而地震之后，雾气白浊，日月不光，旱魃为虐^④，大贼从横，流血丹野，庶品不安，谴诫累至，殆以奸臣权重之所致也。其常侍尤无状者，亟便黜遣^⑤，披埽凶党，收入财贿，以塞痛怨，以答天诫。

①近习，诸佞幸亲近小人也。《礼记》曰：“虽有贵戚近习。”

②《左传》曰“人患王之无厌也，故从乱如归”也。③先后谓进退也。言国家不妄有褒贬进退，而权幸之徒反为祸福也。

④《诗·大雅》曰：“旱魃为虐，如惓如焚。”魃，旱神也。

⑤无状者，谓无善状。

今大将军梁冀、河南尹不疑，处周、邵之任，为社稷之镇，加与王室世为姻族^①，今日立号虽尊可也^②，实宜增修谦节，辅以儒术，省去游娱不急之务，割减庐第无益

之饰。夫君者舟也，人者水也^③。群臣乘舟者也，将军兄弟操楫者也。若能平志毕力，以度元元，所谓福也。如其怠弛，将沦波涛。可不慎乎！夫德不称禄，犹凿墉之趾，以益其高。岂量力审功安固之道哉？凡诸宿猾、酒徒、戏客，皆耳纳邪声，口出谄言，甘心逸游，唱造不义。亦宜贬斥，以惩不轨。令冀等深思得贤之福，失人之累。又在位素餐，尚书怠职，有司依违，莫肯纠察，故使陛下专受谄谀之言，不闻户牖之外。臣诚知阿谀有福，深言近祸，岂敢隐心以避诛责乎！臣生长边远，希涉紫庭，怖慑失守，言不尽心。

①梁商女为顺帝后，后女弟又为桓帝后。冀即商子，故曰代姻也。②可犹宜也。③《家语》孔子曰：“夫君者舟也，人者水也。水可载舟，亦以覆舟。君以此思危，则可知也。”

梁冀忿其刺己，以规为下第，拜郎中。托疾免归，州郡承冀旨，几陷死者再三。遂以《诗》《易》教授，门徒三百余人，积十四年。后梁冀被诛，旬月之间，礼命五至，皆不就。

时太山贼叔孙无忌侵乱郡县，中郎将宗资讨之未服。公车特征规，拜太山太守。规到官，广设方略，寇贼悉平。延熹四年秋，叛羌零吾等与先零别种寇钞关中，护羌校尉段熲坐征^①。后先零诸种陆梁，覆没营坞^②。规素悉羌事，志自奋效，乃上疏曰：“自臣受任，志竭愚钝，实赖兖州刺史牵颢之清猛，中郎将宗资之信义，得承节度，幸无咎誉。今猾贼就灭，太山略平，复闻群羌并皆反逆。臣生长邠岐，年五十有九，昔为郡吏，再更叛羌，豫筹其事，有误中之言。臣素有固疾，恐犬马齿穷，不报大恩，愿乞冗官，备单车一介之使，劳来三辅，宣国威泽，以所

习地形兵械，佐助诸军。臣穷居孤危之中，坐观郡将，已数十年矣。自鸟鼠至于东岱，其病一也^③。力求猛敌，不如清平；勤明吴、孙，未若奉法^④。前变未远，臣诚戚之^⑤。是以越职，尽其区区。”

①颍击羌，坐为凉州刺史郭閼留兵不进下狱。②《说文》曰：“塢，小障也。一曰庠城也。”音乌古反。③郡将，郡守也。鸟鼠，山名，在今渭州西，即先零羌寇钞处也。东岱谓泰山，叔孙无忌反处也。皆由郡守不加绥抚，致使反叛，其疾同也。④吴起，魏将也。孙武，吴将也。言若求猛将，不如抚以青平之政；明习兵书，不如郡守奉法，使之无反也。⑤戚，忧也。前变谓羌反。

至冬，羌遂大合，朝廷为忧。三公举规为中郎将，持节监关西兵，讨零吾等，破之，斩首八百级。先零诸种羌慕规威信，相劝降者十余万。明年，规因发其骑共讨陇右，而道路隔绝，军中大疫，死者十三四。规亲入庵庐，巡视将士，三军感悦。东羌遂遣使乞降，凉州复通。

先是安定太守孙俊受取狼籍，属国都尉李翕、督军御史张奐多杀降羌，凉州刺史郭閼、汉阳太守赵熹并老弱不堪任职，而皆倚恃权贵，不遵法度。规到州界，悉条奏其罪，或免或诛。羌人闻之，翕然反善。沈氏大豪滇昌、饥恬等十余万口，复诣规降。

规出身数年，持节为将，拥众立功，还督乡里，既无它私惠，而多所举奏，又恶绝宦官，不与交通，于是中外并怨，遂共诬规货赂群羌，令其文降^①。天子玺书诘让相属。规惧不免，上疏自讼曰：“四年之秋，戎丑蠢戾^②，爰自西州，侵及泾阳^③，旧都惧骇，朝廷西顾。明诏不以臣愚弩，急使军就道^④。幸蒙威灵，遂振国命，羌戎诸种，

大小稽首，辄移书营郡，以访诛纳^⑤，所省之费，一亿以上。以为忠臣之义，不敢告劳^⑥，故耻以片言自及微效。然比方先事，庶免罪悔^⑦。前践州界，先奏郡守孙俊，次及属国都尉李翕、督军御史张稟；旋师南征，又上凉州刺史郭閼、汉阳太守赵熹，陈其过恶，执据大辟。凡此五臣，支党半国，其余墨绶，下至小吏，所连及者，复有百余。吏托报将之怨，子思复父之耻，载贄驰车，怀粮步走，交构豪门，竞流谤讟，云臣私报诸羌，谢其钱货^⑧。若臣以私财，则家无担石；如物出于官，则文簿易考。就臣愚惑，信如言者，前世尚遗匈奴以宫姬^⑨，镇乌孙以公主^⑩。今臣但费千万，以怀叛羌。则良臣之才略，兵家之所贵，将有何罪，负义违理乎？自永初以来，将出不少，覆军有五，动资巨亿。有旋车完封，写之权门^⑪，而名成功立，厚加爵封。今臣还督本土，纠举诸郡，绝交离亲，戮辱旧故，众谤阴害，固其宜也。臣虽污秽，廉洁无闻，今见覆没，耻痛实深。传称‘鹿死不择音’，谨冒昧略上^⑫。”

①以文簿虚降，非真心也。②蠢，动也。戾，乖也。③县名，属安定郡，其故城在今原州平源县南也。④就犹上也。⑤访，问也。规言羌种既服，臣即移书军营及郡，勘问诛杀并纳受多少之数目也。⑥《诗·小雅》曰：“密勿从事，不敢告劳。无罪无辜，谗口噉噉。”⑦先事谓前辈败将也。⑧谢犹仇也。⑨元帝赐呼韩邪单于待诏掖庭王嫱为阏氏也。⑩武帝以江都王建女细君妻乌孙王昆莫为夫人也。⑪言覆军之将，旋师之日，多载珍宝，封印完全，便入权门。⑫《左传》曰“鹿死不择音，挺而走险，急何能择”也。

其年冬，征还拜议郎。论功当封。而中常侍徐璜、左

愆欲从求货，数遣宾客就问功状，规终不答。璜等忿怒，陷以前事，下之于吏。官属欲赋敛请谢，规誓而不听，遂以余寇不绝，坐系廷尉，论输左校^①。诸公及太学生张凤等三百余人诣阙讼之。会赦，归家。

①《汉官仪》曰，左校署属将作大匠也。

征拜度辽将军，至营数月，上书荐中郎将张奂以自代。曰：“臣闻人无常俗，而政有治乱；兵无强弱，而将有能否。伏见中郎将张奂，才略兼优，宜正元帅，以从众望。若犹谓愚臣宜充军事者，愿乞冗官，以为奂副。”朝廷从之，以奂代为度辽将军，规为使匈奴中郎将。及奂迁大司农，规复代为度辽将军。

规为人多意算，自以连在大位，欲退身避第，数上病，不见听。会友人上郡太守王昱丧还，规缟素越界，到下亭迎之。因令客密告并州刺史胡芳，言规擅远军营，公违禁宪，当急举奏。芳曰：“威明欲避第仕途，故激发我耳^①。吾当为朝廷爱才，何能申此子计邪！”遂无所问。及党事大起，天下名贤多见染逮，规虽为名将，素誉不高。自以西州豪桀，耻不得豫，乃先自上言：“臣前荐故大司农张奂，是附党也。又臣昔论输左校时，太学生张凤等上书讼臣，是为党人所附也。臣宜坐之。”朝廷知而不问，时人以为规贤。

①言欲归第避仕宦之涂也。

在事数岁，北边威服。永康元年，征为尚书。其夏日食，诏公卿举贤良方正，下问得失。规对曰：“天之于王者，如君之于臣，父之于子也。诚以灾妖，使从福祥。陛下八年之中，三断大狱^①，一除内嬖^②，再诛外臣^③。而灾异犹见，人情未安者，殆贤愚进退，威刑所加，有非其理

也。前太尉陈蕃、刘矩^④，忠谋高世，废在里巷；刘祐、冯緄^⑤、赵典、尹勋，正直多怨，流放家门；李膺、王畅、孔翊，洁身守礼，终无宰相之阶。至于钩党之衅，事起无端^⑥，虐贤伤善，哀及无辜。今兴改善政，易于覆手，而群臣杜口，鉴畏前害，互相瞻顾，莫肯正言。伏愿陛下暂留圣明，容受謇直，则前责可弭，后福必降。”对奏，不省。

①谓诛梁冀，诛邓万、邓会，诛李膺等党事也。②无德而宠曰嬖，谓废邓皇后也。③杀桂阳太守任胤，杀南阳太守成瑨、太原太守刘质等也。④《汉官仪》曰：“矩字叔方。”⑤古本反。⑥钩，引也。谓李膺等事也。

迁规弘农太守，封寿成亭侯，邑二百户，让封不受。再转为护羌校尉。熹平三年，以疾召还，未至，卒于穀城，年七十一。所著赋、铭、碑、赞、祷文、吊、章表、教令、书、檄、笺记，凡二十七篇。

论曰：孔子称“其言之不忤，则其为之也难^①”。察皇甫规之言，其心不忤哉！夫其审己则干禄，见贤则委位，故干禄不为贪，而委位不求让；称己不疑伐，而让人无惧情。故能功成于戎狄，身全于邦家也。

①忤，慊也。

张奂字然明，敦煌渊泉人也^①。父惇，为汉阳太守。奂少游三辅，师事太尉朱宠，学《欧阳尚书》。初，《牟氏章句》浮辞繁多^②，有四十五万余言，奂减为九万言。后辟大将军梁冀府，乃上书桓帝，奏其《章句》，诏下东观。以疾去官，复举贤良，对策第一，擢拜议郎。

①渊泉，县名，地多泉水，故城在今瓜州晋昌县东北也。②时

牟卿受书于张堪，为博士，故有《牟氏章句》。

永寿元年，迁安定属国都尉。初到职，而南匈奴左薁鞬台耆、且渠伯德等七千余人寇美稷，东羌复举种应之，而免壁唯有二百许人，闻即勒兵而出。军吏以为力不敌，叩头争止之。免不听，遂进屯长城，收集兵士，遣将王卫招诱东羌，因据龟兹^①，使南匈奴不得交通东羌。诸豪遂相率与免和亲，共击薁鞬等，连战破之。伯德惶恐，将其众降，郡界以宁。

①龟兹音丘慈，县名，属上郡。《前书音义》曰“龟兹国人来降之，因以名县”也。

羌豪帅感免恩德，上马二十匹，先零酋长又遗金镡八枚。免并受之^①，而召主簿于诸羌前，以酒酹地曰^②：“使马如羊，不以入厩；使金如粟，不以入怀。”悉以金马还之^③。羌性贪而贵吏清，前有八都尉率好财货，为所患苦，及免正身洁己，威化大行。

①郭璞注《山海经》云：“镡音渠，金银器名。”未详形制也。

②以酒沃地谓之酹。音力外反。③如羊如粟，喻多也。

迁使匈奴中郎将。时休屠各^①及朔方乌桓并同反叛，烧度辽将军门^②，引屯赤坑，烟火相望。兵众大恐，各欲亡去。免安坐帷中，与弟子讲诵自若，军士稍安。乃潜诱乌桓阴与和通，遂使斩屠各渠帅，袭破其众。诸胡悉降。

①屠音直于反。②时度辽将军屯五原。

延熹元年，鲜卑寇边，免率南单于击之，斩首数百级。

明年，梁冀被诛，免以故吏免官禁锢。免与皇甫规友善，免既被锢，凡诸交旧莫敢为言，唯规荐举前后七上。在家四岁，复拜武威太守。平均徭赋，率厉散败，常为诸

郡最，河西由是而全。其俗多妖忌，凡二月、五月产子及与父母同月生者，悉杀之。免示以义方，严加赏罚，风俗遂改，百姓生为立祠。举尤异，迁度辽将军。数载间，幽、并清静。

九年春，征拜大司农。鲜卑闻免去，其夏，遂招结南匈奴、乌桓数道入塞，或五六千骑，或三四千骑，寇掠缘边九郡，杀略百姓。秋，鲜卑复率八九千骑入塞，诱引东羌与共盟诅。于是上郡沈氏、安定先零诸种共寇武威、张掖，缘边大被其毒。朝廷以为忧，复拜免为护匈奴中郎将，以九卿秩督幽、并、凉三州及度辽、乌桓二营^①，兼察刺史、二千石能否，赏赐甚厚。匈奴、乌桓闻免至，因相率还降，凡二十万口。免但诛其首恶，余皆慰纳之。唯鲜卑出塞去。

^①明帝永平八年，初置度辽将军，屯五原郡曼柏县，《汉官仪》曰“乌丸校尉屯上谷郡宁县”，故曰二营。

永康元年春，东羌、先零五六千骑寇关中，围役祠，掠云阳。夏，复攻没两营，杀千余人。冬，羌岸尾、摩螯等^①胁同种复钞三辅。免遣司马尹端、董卓并击，大破之，斩其酋豪，首虏万余人，三州清定。论功当封，免不事宦官，故赏遂不行，唯赐钱二十万，除家一人为郎。并辞不受，而愿徙属弘农华阴。旧制边人不得内移，唯免因功特听，故始为弘农人焉。

^①螯音必薛反。

建宁元年，振旅而还。时窦太后临朝，大将军窦武与太傅陈蕃谋诛宦官，事泄，中常侍曹节等于中作乱，以免新征，不知本谋，矫制使免与少府周靖率五营士围武。武自杀，蕃因见害。免迁少府，又拜大司农，以功封侯。免

深病为节所卖，上书固让，封还印绶，卒不肯当。

明年夏，青蛇见于御坐轩前^①，又大风雨雹，霹雳拔树，诏使百僚各言灾应。免上疏曰：“臣闻风为号令，动物通气^②。木生于火，相须乃明。蛇能屈申，配龙腾蛰^③。顺至为休征，逆来为殃咎。阴气专用，则凝精为雹。故大将军窦武、太傅陈蕃，或志宁社稷，或方直不回，前以谗胜，并伏诛戮，海内默默，人怀震愤。昔周公葬不如礼，天乃动威^④。今武、蕃忠贞，未被明宥，妖眚之来，皆为此也。宜急为改葬，徙还家属。其从坐禁锢，一切蠲除。又皇太后虽居南宫，而恩礼不接，朝臣莫言，远近失望。宜思大义顾复之报^⑤。”天子深纳免言，以问诸黄门常侍，左右皆恶之，帝不得自从。

①轩，殿槛阑板也。②《翼氏风角》曰：“凡风者天之号令，所以谴告人君者也。”③《易》曰“龙蛇之蛰，以存身也。”

《慎子》曰“腾蛇游雾，飞龙乘云，云罢雾散，与蚯蚓同”也。

④《尚书大传》：“周公薨，成王欲葬之于成周，天乃雷雨以风，禾即尽偃，大木斯拔，国人大恐。王葬周公毕，示不敢臣也。”⑤顾，旋视也。复，反复也。《小雅》曰：“父兮生我，母兮鞠我，顾我复我，出入腹我。”

转免太常，与尚书刘猛、刁韪、卫良同荐王畅、李膺可参三公之选，而曹节等弥疾其言，遂下诏切责之。免等皆自囚廷尉，数日乃得出，并以三月俸赎罪。司隶校尉王寓，出于宦官，欲借宠公卿，以求荐举，百僚畏惮，莫不许诺，唯免独拒之。寓怒，因此遂陷以党罪，禁锢归田里。

免前为度辽将军，与段颍争击羌，不相平。及颍为司隶校尉，欲逐免归敦煌，将害之。免忧惧，奏记谢颍曰：

“小人不明，得过州将，千里委命，以情相归^①。足下仁笃，照其辛苦，使人未反，复获邮书。恩诏分明，前以写白，而州期切促，郡县惶惧，屏营延企，侧待归命。父母朽骨，孤魂相托，若蒙矜怜，壹惠咳唾，则泽流黄泉，施及冥冥，非免生死所能报塞。夫无毛发之劳，而欲求人丘山之用，此淳于髡所以拍髀仰天而笑者也^②。诚知言必见讥，然犹未能无望。何者？朽骨无益于人，而文王葬之^③；死马无所复用，而燕昭宝之^④。党同文、昭之德，岂不大哉^⑤！凡人之情，冤则呼天，穷则叩心。今呼天不闻，叩心无益，诚自伤痛。俱生圣世，独为匪人^⑥。孤微之人，无所告诉。如不哀怜，便为鱼肉^⑦。企心东望，无所复言。”颍虽刚猛，省书哀之，卒不忍也。时禁锢者多不能守静，或死或徙。免闭门不出，养徒千人，著《尚书记难》三十余万言。

①《汉官仪》曰：“司隶州部河南雒阳，管三辅、三河、弘农七郡。”所以免屈于颍，称曰“州将”焉。②拍音片百反。髀音步弟反。《史记》，楚发兵伐齐，齐威王使淳于髡赍百金，车马十驷，之赵请救。髡仰天大笑，冠缨索绝。王曰：“先生少之乎？”髡曰：“今者臣从东方来，见道傍有壤田者，操一豚蹄，酒一盂，而祝曰：‘瓿娄满篝，污邪满车，五谷蕃熟，穰穰满家。’臣见其所持者狭，所求者奢，故笑。”于是王乃益以黄金千镒、白璧十双、车马百驷也。③《新序》曰：“文王作灵台，掘得死人骨，吏以闻。文王曰：‘葬之。’吏曰：‘此无主矣。’文王曰：‘有天下者，天下之主也；有一国者，一国之主也。寡人固其主焉。’令吏以棺葬之。天下闻之，曰：‘文王贤矣，泽及朽骨，又况人乎。’”④《新序》曰：“燕昭王即位，卑身求贤。谓郭隗曰：‘齐因孤国之乱而袭燕，然得贤士与共国，以雪先王之丑，孤之愿也。先生视可者，得身事之。’